

四庫全書

經部

欽定四庫全書

經部

五禮通考卷二百三十九

詳校官侍郎臣劉躍雲

給事中臣溫常綬覆勘

總校官進士臣繆琪

校對官中書臣王鍾泰

謄錄監生臣閔學洙

欽定四庫全書

五禮通考卷二百三十九

刑部尚書秦蕙田撰

軍禮七

出師

周禮天官太宰作大事則戒于百官贊王命

注謂助王為教令春

秋傳曰國之大事在祀與戎

小宰以法掌祭祀朝覲會同賓客之戒具軍旅亦如之

令百官府共其財用治其施舍聽其治訟

春官典瑞牙璋以起軍旅以治兵守

鄭氏鐸曰半圭曰璋長七寸瑑為齒牙之形取牙齒之剛利噬齧兵之象故執以起軍旅若屯兵于外守要害之地有不率紀

李氏嘉會曰牙璋則軍旅之大者用之中璋則軍旅之小者用之

地官大司徒大軍役以旗致萬民而治其徒庶之政令縣師若將有軍旅田役之戒則受法于司馬以作其衆庶及馬牛車輦使皆備旗鼓兵器以帥而至

夏官諸子掌國子之倅若有兵甲之事則授之車甲合

其卒伍以軍法治之

注國子謂諸侯卿大夫士之子也

李氏曰王者之師非直興于閭里而又取諸世族彼以父祖富貴宜有報上之心況嘗學德行道藝孰不知忠孝之美任之以金革與夫干賞蹈利庸徒鬻賣者蓋有間矣

司右掌羣右之政令凡軍旅會同合其車之卒伍而比其乘屬其右

戎右掌戎車之兵革使

注謂王使以兵有所誅斬也春秋傳曰戰于穀晉梁宏御戎萊

駒為右戰之明日襄公縛秦囚使萊駒以戈斬之

詔贊王鼓

注既告王當鼓之節又助擊之疏

太僕已贊王鼓此亦傳王命于陳中

注為王大言之也

黃氏曰掌戎車之兵革使蓋戰事也戰重戎右專使事也鄭引左氏萊駒斬囚事其小者耳

虎賁氏掌先後王而趨以卒伍軍旅會同亦如之

旅賁氏掌執戈盾軍旅則介而趨

注介被甲

王氏曰旅賁則王衛之尤親者王吉服則亦吉服王凶服則亦凶服王戎服則亦戎服亦與王同其憂樂也

太僕凡軍旅贊王鼓

注王通鼓佐擊其餘面也疏王通鼓者謂王親將軍衆代王擊乃

擊之若鼓人云金鐸通鼓之類也王執路鼓路鼓四面佐擊其餘面也

地官鼓人以鼗鼓鼓軍事

注鼗鼓長八尺大鼓謂之鼗疏其長八尺對晉鼓六尺

六寸者為大

鄧氏元錫曰鼗從賁氣盛意鼓軍事以氣盛為壯也

魏氏校曰鼓大而短則其聲疾而短聞小而長則其聲舒而遠聞鼗之為言大也因以肅軍令

凡軍旅夜鼓鑿軍動則鼓其衆

春官大師大師執同律以聽軍聲而詔吉凶

注大師大起軍師兵

書曰王者行師出軍之日授將弓矢士卒振旅將張弓大呼大師吹律合音商則戰勝軍士強角則軍擾多變失士心官則軍和士卒同心徵則將急數怒軍士勞羽則兵弱少威明

大史抱天時與大師同車

小史佐大史

天官幕人軍旅共其帷幕幄帟綬

掌次師田則張幕設重帟重案

地官廩人凡師役之事則治其糧與其食

封人軍旅則飾其牛牲

天官外饗師役則掌其獻賜脯肉之事

地官委人軍旅共其委積薪芻

遺人凡師役掌其道路之委積

牛人軍事共其犒牛凡軍旅行役共其兵車之牛

狄官小行人若國師役則令犒禴之

注犒讀如犒師之
禴即大宗伯以

禴禮哀
圓敗也

野廬氏邦之有大師則令掃道路且以幾禁行作不時者不物者

鄭氏鍔曰國大用師道路之行欲無荒穢不祥之事
苟于是時不當行而行不當作而作失蚤晚之時非
所當衣而衣之非所當操而操之非其物而有異常
之狀皆姦人之為寇盜者也微伺而幾察之以防變

也周之制于田野之道十里之遠設官以治其廬舍禁止姦盜如此之嚴則道不拾遺豈不宜哉後世十里一亭亭必有長其法亦出于此

司烜氏軍旅脩火禁

鄭氏鍔曰衆之所聚器甲資糧勝敗所係則火禁不可不謹也

銜枚氏軍旅田役令銜枚

注為其言語以相誤

王氏昭禹曰軍旅田役大衆所聚惡譁而喜靜故令銜枚大祭祀止于令禁無囂者承祭祀者不若軍旅之衆田役之衆

伊耆氏軍旅授有爵者杖

黃氏曰有爵者皆有統率在軍見王見帥
宜當執杖今三衙兵官常朝亦執杖也

鄭氏鏐曰軍中以斧鉞為威將帥所執爾若有爵者
在其中既非仗鉞之將又非將校之列宜有以表異
之故授以杖見
其爵位之尊

夏官挈壺氏掌挈壺以令軍井挈轡以令舍挈釜以令

糧注鄭司農云挈壺以令軍井謂為軍穿井井成則挈
壺懸其上令軍中士衆皆望見知此下有井壺所以
使軍望見知之當舍止于此轡所以駕舍故以轡表舍
挈釜以令糧亦懸釜于其所當稟假之處令軍望見知
稟假于此下也釜以盛糧之器故以釜表稟軍中人多
車騎雜會謹號令不能相聞故
以其物為表省煩趨疾于事便也
凡軍事懸壺以序聚

櫟注鄭司農云懸壺以為漏以序衆櫟以次更聚繫櫟備守也玄謂擊櫟兩木相敲行夜時也

右軍中職事

夏官量人營軍之壘舍量其市朝州涂軍社之所里

鄭氏鍔曰營軍之壘舍非徒欲廣狹足以容又以社主為重所居之處欲其不褻

王氏昭禹曰兵法曰善戰致人而不致于人夫我案兵無動而致敵使來以逸待勞宜勝之矣

禮記曲禮行前朱鳥而後玄武左青龍而右白虎招搖

在上急繕其怒進退有度左右有局各司其局注朱鳥玄武青

龍白虎以此四獸為軍陣象天也急猶堅也繕讀曰勦又畫招搖星于旌旗上以堅勦軍之威怒象天帝也招

搖星在北斗杓端主指者度謂伐與步數局部分也
疏此明軍行象天文而作陣法也前南後北左東西
朱雀立武青龍白虎四方宿名也軍前宜捷故用雀軍
後須殿捍故用立武立武龜也龜有甲能禦侮也左為
陽陽能生發象龍變也右為陰陰沈能殺虎沈殺也軍
之左右生殺變應威猛如龍虎也鄭注四獸為軍陣則
是陣法但不知何以為之今之軍行畫此四獸于旌旗
以標左右前後之軍陣招搖北斗七星北方居四方宿
之中以斗末從十二月建而指之則四方宿不差今軍
行法之亦作此北斗星在軍中舉之于上以指正四方
使四方之陣不差也急繕其怒者軍行既張四宿于四
方標招搖于中上象天之行故軍旅士卒起居舉動堅
勁奮勇如天帝之威怒也度謂伐與步數牧誓云今日
之事不愆于六步七步四伐五伐一擊一剌為一伐也
左右有局者局部分也軍之左右各有部分不相濫也
各司其局者軍行須監領故主帥部分各有所司部分

也

蕙田案正義引昭二十一年左傳宋人與華
亥戰云鄭翩願為鵠其御願為鶩又兵書云
善用兵者似率然率然者常山蛇擊其首則
尾至擊其尾則首至擊其中則首尾俱至則
朱鳥等皆是陣法崔靈恩謂軍行所置旌旗
畫此四物其說淺陋非康成意也

觀承案戴禮此條即古八陣法也握機經四

維方而主靜正兵布陣用之四正員而主動
奇兵制勝用之蓋用後天八卦之位而其天
前衝地後衡則先天之體亦存其中曲禮只
主出行之時故專據龍虎鳥蛇為震兌離坎
四卦員而主動者言之其四維四卦之方而
主靜者不言可知至招搖在上應指大將之
旌麾而言所以行軍布陣指揮兵衆為三軍
之司命者也故曰急繕其怒者所以作其氣

也若進退有度左右有局各司其局則坐作
進退疾徐變化之法俱在其中矣古法無傳
握機經是其遺制武侯之八陣亦即根源於
此耳豈知熟讀曲禮都已包括而提其綱要
也哉

右營陣行列

周禮春官巾車掌王之五路革路龍勒條纓五就建太

白以即戎

注革路輓之以革而漆之無他飾龍駝也以
白黑飾韋雜色為勒條讀為條其樊及纓以

像絲飾之而五成不言樊蓋脫爾太白殷之旗猶周大赤蓋象正色也即戎謂兵事疏趙商問巾車職云建太白以即戎司馬職仲秋辨旗物以治兵王載大常下注云凡頒旗物以出軍之旗則如秋不知巾車太白以即戎為在何時答曰旗之正色者或會事或勞師不親將故建先王之正色異于親自將又案司馬法云章夏以日月上明殷以虎上威周以龍上文不用大常者周雖以日月為常以龍為章故郊特牲云龍章而設日月又案周本紀武王遂入至紂所王射之三發而後下車以輕劍斬紂頭縣于太白之旗不用大常者時未有周禮故武王雖親將猶用太白也

典路凡軍旅以路從

注二乘一路典路以其餘路從行亦以華國

夏官戎僕掌馭戎車

注戎車革路也師出王乘以自將

掌王倅車之政

正其服

注倅副也戎車者之衣服

謂衆乘

掌凡

戎車之儀

注凡戎車衆之兵車

也書序武王戎車三百兩

疏凡

語廣故知衆兵車即三百兩也

鄭氏

鐸曰武王戎車三百兩與紂戰于牧野王自將

則乘戎路戎僕為之馭正其所衣之服以戎事之服

異乎乘車之服乘車之服主于文而戎事以武為主

不可以不正也

易氏被曰上文言馭戎車則王之革路此言凡戎車

則衆之兵車也武王戎車三百兩其進退之節不愆

于六步七步不愆于四伐五伐六伐七伐乃止齊焉

則戎車之儀可知大司馬于蒐田之時亦有所謂生

作進退疾徐疏數之節戎

僕所以掌其儀者此也

春官車僕掌戎路之萃廣車之萃闕車之萃革車之萃

輕車之萃

注萃猶副也此五者皆兵車所謂五戎也戎路王在軍所乘也廣車橫陣之車也闕車所

用補闕之車也革猶屏也所用對敵自蔽隱之車也輕車所用馳敵致師之車也春秋傳曰公喪戎路又曰其

君之戎分為二廣則諸侯戎路廣車也又曰帥旂闕四十乘孫子八陣有革車之陣又曰馳車千乘

凡師共革車各以其萃

注五戎者共其一以為王優尊者所乘也而萃各從其元焉

六輻車者軍之羽翼也所以陷堅陣要強敵遮北走也

王氏昭禹曰凡師共革車則師之所用者其車皆以革鞅之

鄭氏鍔曰革車亦各有萃所以為不可敗之策

禮記曲禮兵車不式

注尚威武不崇敬

武車綏旌

注武車亦革路也取其建

武即云兵車取其威猛即云武車旌謂車上旌也綏謂垂舒

陳氏誥曰兵車革輅也尚勇猛無推讓故不式武車亦革輅也取其建戈刃即云兵車取其威猛即云武

車旌車上旌旗也尚威武故舒散若垂縷然

司馬法夏后氏曰鉤車先正也殷曰寅車先疾也周

曰元戎先良也

右車路

周禮春官司常凡軍事建旌旗及致民置旗弊之

注始置旗

以致民民至仆
之誅後至者

王氏曰置者植
之弊者仆之

鄭氏鐸曰軍旅之事用旌旗以指麾則掌建之始焉
置之以致民使來終焉弊之以誅後至皆司常所掌
也

禮記曲禮前有水則載青旌前有塵埃則載鳴鳶前有

車騎則載飛鴻前有士師則載虎皮前有摯獸則載貔貅

貅注載謂舉旌于首以警衆也禮君行師從卿行旅從
前驅舉此則士衆知有所舉各以其類象之青青雀

水鳥也鳶鳴則天將風風生埃起鴻取飛有行列也士
師謂兵象也虎取其有威勇貌貅亦摯獸書曰如虎如

貌

司馬法旂夏后氏玄人之執也殷白天之義也周黃
地之道也章夏后氏以日月尚明也殷以虎尚威也
周以龍尚文也

右旌旗

周禮夏官司兵掌五兵五盾各辨其物與其等以待軍

事

注五盾干櫓之屬等謂功沽上下五兵者戈矛戟酋
矛夷矛疏言各辨其物與其等者五兵五盾各有

物色與其善惡
長短大小之等及授兵從司馬之法以頒之及其受兵

輸亦如之

注從司馬之法令師旅卒兩人數所用多少也兵輸謂師還有司還兵也疏受兵從司

馬之法者司馬主六軍是一官之長先受于王命知多少乃始出軍故從司馬法以頒之

鄭氏鍔曰物色也各辨其物色使以類相從等者所制之長短小大司兵授之以兵則從司馬之法多乎其數則闕國之守備寡乎其數則乏軍之用器軍之行也從其法而頒之及其還也受其所輸亦當如始者所頒之法苟有亡矢遺鏃之事亦如之矣

軍事建車之五兵會同亦如之

鄭氏鍔曰軍旅之車上必建五兵出先刃入後刃也會同王乘車則亦建焉皆以示威也

司戈盾軍旅授貳車戈盾建乘車之戈盾授旅賁及虎

士戈盾

注乘車王所乘車也軍旅則革路疏軍旅貳車貳有車右故授之以戈盾云乘車之戈盾者

王所乘車有車右故建戈盾授旅賁氏及虎士戈盾者衛王故也

及舍設藩盾行則斂之

注舍止也藩盾盾可以藩衛者如今之扶蘇殿疏扶蘇舉漢

法况

劉氏彛曰旅賁夾王車左右而虎士趨王車後先舍則守王閑則父與戈盾戒備之尤急者也非其有屏蔽之用乎

司弓矢掌六弓四弩八矢之法凡弩夾庾利攻守唐大

利車戰野戰

注攻城壘者與自守者相迫近弱弩發疾也車戰野戰進退非強則不及

凡矢枉矢絜矢利火射用諸守城車戰殺矢鏃矢用諸

近射

注枉矢絜矢二者皆可結火以射敵殺矢言中則死鏃矢象馬二者皆可以射敵之近者

凡師役頒弓弩各以其物從授兵至之儀

注物弓弩矢簳之屬

鄭氏鐸曰師役用兵之時會同行禮之時事異禮異故各以其所當用之物而頒之

右兵器

禮記曲禮介冑則有不可犯之色

馬氏曰兵車者以威克愛也以威克愛則服必稱情容必稱服故戎容暨暨介冑有不可犯之色者以此也

介者不拜為其拜而菱拜

朱子曰菱猶言有所枝拄不利屈伸也

少儀乘兵車出先刃入後刃軍尚左卒尚右

陳氏濬曰先刃刃向前也後刃不以刃向國也左陽生道也右陰死道也左將軍為尊其行伍皆尊尚左方欲其無覆敗也士卒之行伍尊尚右方示有必死之志也

軍旅思險隱情以虞

陳氏濬曰軍行舍止經由之處必思為險阻之防又當隱密已情以虞度彼之情計也

玉藻戎容暨暨言容詒詒色容厲肅視容清明

司馬法古者軍容不入國國容不入軍軍容入國則民德廢國容入軍則民德弱故在國言文而語溫在朝恭以遜脩已以待人不召不至不問不言難進易退在軍抗而立行遂而果介者不拜兵車不式城上不趨危事不齒故禮與法表裏也文與武左右也春秋僖公三十三年左氏傳秦師過周北門左右免胄而下超乘者三百乘王孫滿尚幼觀之言于王曰秦師輕而無禮必敗輕則寡謀無禮則脫入險而脫又不

能謀能無敗乎

右軍容

書甘誓左不攻于左汝不恭命右不攻于右汝不恭命御非其馬之正汝不恭命

朱氏升曰在車左不治主射之事在車右不治擊刺之事御者居中不得馳驅之正皆不恭命也

牧誓今日之事不愆于六步七步乃止齊焉不愆于

四伐五伐六伐七伐乃止齊焉尚桓桓如虎如貔如

熊如羆于商郊弗迓克奔以役西土

傳戰事就敵不過六步七步乃止相

齊言當旅進一心伐謂擊刺少則四五多則六七以為
例桓武貌貌執夷虎屬也四獸皆猛健欲使士衆法之
奮擊于牧野商衆能奔來降者不迎
擊之如此則所以役我西土之義

司馬法逐奔不過百步縱綏不過三舍

家語工尹商陽與陳棄疾追吳師及之陳棄疾謂工
尹商陽曰王事也子手弓而可手弓子射諸射之斃
一人韋弓又及謂之又斃二人每斃一人揜其目止
其御曰朝不坐燕不與殺三人亦足以反命矣孔子
曰殺人之中又有禮焉子路怫然進曰人臣之節當

君大事唯力所及死而後已夫子何善此子曰然如汝言也吾取其有不忍殺人之心而已

蕙田案此事亦見檀弓

荀子王者之軍制將死鼓御死轡百吏死職士大夫死行列聞鼓聲而進聞金聲而退順命為上有功次之令不進而進猶令不退而退也其罪唯均不殺老弱不獵禾稼服者不禽格者不舍犇命者不獲凡誅非誅其百姓也誅其亂百姓者也百姓有扞其賊則

是亦賊也以故順刃者生蘇刃者死犇命者貢
王者有誅而無戰城守不攻兵革不擊上下相喜則
慶之不屠城不潛軍不留衆師不越時故亂者樂其
政不安其上欲其至也

右坐作進退擊刺之節

周禮秋官鄉士大軍旅則各掌其鄉之禁令帥其屬夾
道而蹕

士師掌國之五禁之法以左右刑罰五曰軍禁

注古之
禁書亡

矣今軍有囂
譴夜行之禁

夏官小子凡師田斬牲以左右徇陳

注示犯誓
必殺之

銜枚氏軍旅令銜枚禁詔呼歎鳴于國中者

書費誓今惟淫舍牯牛馬杜乃獲斂乃甯無敢傷牯牯
之傷汝則有常刑 馬牛其風臣妾逋逃勿敢越逐祇
復之我商賚汝乃越逐不復汝則有常刑無敢寇攘踰
垣牆竊牛馬誘臣妾汝則有常刑 甲戌我惟征徐戎
峙乃糗糧無敢不逮汝則有大刑魯人三郊三遂峙乃

楨幹甲戌我惟築無敢不供汝則有無餘刑非殺魯人
三郊三遂峙乃芻茭無敢不多汝則有大刑

呂氏曰先治戎備次之以除道路又次之以嚴
部伍又次之以立期會先後之序皆不可紊

司馬法冢宰與百官布令於軍曰入罪人之地無暴
神祇無行田獵無毀土功無燔牆屋無伐林木無取
六畜禾黍器械見其老幼奉歸勿傷雖遇壯者不校
勿敵敵若傷之醫藥歸之

右軍中禁令

周禮夏官大司馬及戰巡陳眡事而賞罰

秋官大司寇大軍旅涖戮于社

注社謂社主在軍者鄭司農曰書曰用命賞于

祖不用命戮于社

小司寇小師涖戮

注小師王不自出之師

王氏昭禹曰大司寇大軍旅涖戮故小司寇小師涖戮

鄉士大軍旅則各掌其鄉之禁令凡國有大事則戮其

犯命者

疏大事謂征伐故有犯命刑戮之事

士師大師帥其屬而禁逆軍旅者與犯師禁者而戮之

注逆軍旅反將命也
犯師禁干行陣也

鄭氏鐸曰王師所過而敢有沮遏或所須而有不從
令者軍中之禁而輒敢干犯則不循軍法之人也安
可不戮耶晉魏絳將與狄人戰于太原荀吳之嬖人
不肯即卒則斬之雞澤之盟晉侯之弟楊干亂行于
曲梁魏絳戮其
僕正謂是也

易氏被曰帥其屬而行其戮所以正軍旅之
法凡此皆以刑官之士師任其職重其事也

書甘誓用命賞于祖不用命戮于社傳天子親征必載
遷廟之祖主行有

功則賞祖主前示不專又載社主謂之社事不用命奔
北者則戮之于社主前社主陰陰主殺親祖嚴社之義
疏曾子問云孔子曰天子巡狩以遷廟之主行載之
于齋車言必有尊也巡狩尚然征伐必也定四年左傳

又云君以軍行被社釁鼓祝奉以從是天子親征又載社主之事也郊特牲云惟為社事單出里故以社事言之所以刑賞異處者社主陰陰主殺祖主陽陽主生禮左宗廟右社稷是祖陽社陰就祖賞就社殺親祖嚴社也之義

司馬法賞不踰時欲民速得為善之利也罰不遷列欲民速覩為不善之害也

孔叢子問軍禮有司簡功行賞不稽于時其用命者則加爵受賜于祖奠之前其奔北犯令者則戮于社主之前信陵君問于子高曰古者軍旅賞人必于祖

戮人必于社其義何也答曰賞功于祖告分之均示不敢專也戮罪于社告中于土示聽之當也

子路問於孔子曰臧武仲率師與邾人戰于狐鮐遇敗焉師人多喪而无罰古之道然與孔子曰凡謀人之軍師敗則死之謀人之國邑危則亡之古之正也其君在焉者有詔則無討

右軍中刑賞

禮記曾子問曾子問曰古者師行必以遷廟主行乎孔

子曰天子巡狩以遷廟主行載于齊車言必有尊也今也取七廟之主以行則失之矣當七廟五廟無虛主虛主者唯天子崩諸侯薨與去其國與祫祭于祖為無主耳曾子問曰古者師行無遷主則何主孔子曰主命問曰何謂也孔子曰天子諸侯將出必以幣帛皮圭告于祖禰遂奉以出載于齊車以行每舍奠焉而後就舍反必告設奠卒斂幣玉藏諸兩階之間乃出蓋貴命也

陳氏澠曰既以幣玉告于祖廟則奉此幣玉猶奉祖宗之命也故曰主命每舍必奠神之也反則設奠以

告而埋藏之
不敢褻也

真氏德秀曰先儒謂廟無虛主有廟者不可以其主
行主命謂雖無木主但所受于神之命即是主也
吳氏澂曰遷廟主謂祔祔時所遷昭穆最上之廟一
主也在昭廟穆廟之上最尊最親者也君將出行時
徧告有廟之諸主又特告此
無廟之一主而載之以行也

周禮春官小宗伯若大師則帥有司而立軍社奉主車

鄭氏鏐曰古者大師則先有事于社與廟然後載社
主與遷廟之主以行不用命戮于社故載社主將以
行戮用命賞于祖故載遷廟之主將以行賞小宗伯
掌社稷宗廟之禮宜載以行乃言立者蓋社本不在
軍因用師始立之立者出于一時之故廟主為尊載
之以行不敢忽也故言奉奉以言其肅欽之至帥有

司者蓋帥大祝也大祝職曰大師宜于社造于祖設軍社國將有事于四望及軍歸獻于社則前祝故知此所謂有司為大祝明矣

肆師凡師甸用牲于社宗則為位

易氏祓曰用師者必載社之石主祖之木主示有所受命

鄭氏鍔曰夫甸獵之甸乃四時蒐苗獮狩之田師甸則大用師以對敵之時何以明之以所祭之神知之用師則載社主與遷廟之主以行此用牲于社宗大戰則類造于上帝封于大神祭兵于山川此有類造封祭之事豈四時之甸所宜有耶故知以師甸言社者主也宗者遷廟之主不曰祖曰宗者宗繼祖者也載主而行不在國之常位而祭不可以無位無位則鬼神無所依故為位然後祭小宗伯于軍旅甸後禱

祠為位則止為位于肆儀之時肆師于用牲以祭時則為位者蓋所掌者立祀用牲之禮故也

周禮春官大祝大師設軍社則前祝

注鄭司農說設軍社以春秋傳曰所

謂君以師行祓社釁鼓祝奉以從者也疏軍將出祭于社即將社主行不用命戮于社出必七廟俱祭取遷

廟之主行用命賞于祖皆載于齋車社在軍中故云設軍社

王氏安石曰詩云乃立冢土戎醜攸行所謂設軍社也

鄭氏錡曰大師必載社主與遷廟之主以行及軍之所在則必設軍中之社于其地此國外之禮小宗伯所謂帥有司而立軍社是也

小祝大師掌釁祈號令

王氏昭禹曰蓋軍行殺牲以血釁鼓以禦妖釁求其所斷焉故謂之釁祈小祝則號致焉而後祝耳

鄭氏鍔曰祓社釁鼓以除去不祥祈軍有功大祝掌宜社造祖之事小祝掌其釁祈之祝號

王氏曰大師掌釁祈號祝則左傳所謂軍行祓社釁鼓祝奉以從

春秋定公四年左氏傳衛祝佗子魚曰君以軍行祓社釁鼓祝奉以從

真氏德秀曰古禮天子親征必奉廟主社主從軍而行有功則賞于廟主前不用命則戮于社主前示不專也

孔叢子問軍禮天子出征命有司以特牲告社告以

所征之事而受命焉以齋車載遷廟之主及社主行
大司馬職奉之無遷廟主則以幣帛皮圭告于祖禰
謂之主命亦載齋車凡行主皮圭幣帛皆每舍奠焉
而後就館主車止于中門之外外門之內廟主居于
道左社主居于道右

周禮春官小官伯若軍將有事則與祭有司將事于四

望

注軍將有事將與敵合戰也與祭有司謂大祝之屬蓋司馬之官實典焉

王氏曰先王雖以至仁伐至不仁然君子臨事而懼故有事于祭焉

鄭氏鐸曰軍將有事則與祭者主帥奉祭小宗伯以職當立之奉之故當與也小宗伯已與祭于軍中則四望之祭必遣其所屬之有司往行事焉理之宜也戰必禱于神欲氣勢之增倍四望又山川之尤大者國家所賴以為阻固是以將戰則禱焉欲其為兵之捍蔽

孔叢子問軍禮及至敵所將戰太史卜戰日卜右御先期三日有司明以敵人罪狀告之史史定誓命戰日將帥陳列車甲卒伍于軍門之前有司讀誥誓使周定三令五申既畢遂禱戰祈克于上帝然後即敵將士戰全已克敵史擇吉日復禡于所征之地柴于

上帝祭社奠祖以告克者不頓兵傷士也戰不克則不告也

右軍中之祭

周禮夏官環人掌致師

注致師者致其必戰之志古者將戰先使勇力之士犯敵焉

疏古者將戰先使勇力之士犯敵焉者案文十二年秦伯伐晉秦人欲戰秦伯謂士會曰若何而戰對曰若使輕者肆焉其可注云肆突言使輕銳之兵往驅突晉軍隱九年北戎侵鄭公子突曰使勇而無剛者嘗寇而速去之注云勇則能

揚軍旅

注為之威武以觀敵

鄭氏鐸曰戰必致師蓋使環人犯敵以致吾必戰之志使敵人怒而求戰其致之自吾也

王氏昭禹曰兵法曰善戰者致人而不致于人夫我按兵無動而致敵使來以逸待勞宜勝之矣

春秋宣公十二年左氏傳楚許伯御樂伯攝叔為右以致晉師許伯曰吾聞致師者御靡旌摩壘而還樂伯曰吾聞致師者左射以蔽代御執轡御下兩馬掉鞅而還攝叔曰吾聞致師者右入壘折馘執俘而還皆行其所聞而復

右致師

春秋隱公二年十有二月鄭人伐衛 四年春王二月

莒人伐杞取牟婁夏宋公陳侯蔡人衛人伐鄭秋翬帥師會宋公陳侯蔡人衛人伐鄭五年秋九月邾人鄭人伐宋冬十有二月宋人伐鄭圍長葛七年秋公伐邾冬戎伐凡伯于楚丘以歸十年夏翬帥師會齊人鄭人伐宋秋宋人蔡人衛人伐戴鄭伯伐取之

桓公五年秋蔡人衛人陳人從王伐鄭十二年十有二月及鄭師伐宋丁未戰于宋十四年冬十有二月宋人以齊人蔡人衛人陳人伐鄭十五年冬十有一

月公會宋公衛侯陳侯于袤伐鄭 十六年夏四月公

會宋公衛侯陳侯蔡侯伐鄭

莊公二年夏公子慶公帥師伐於餘丘 三年春王正

月溺會齊師伐衛 五年冬公會齊人宋人陳人蔡人

伐衛 九年夏公伐齊納子糾 十四年春齊人陳人

曹人伐宋夏單伯會伐宋 十五年秋宋人齊人邾人

伐邾 十六年夏宋人齊人衛人伐鄭秋荆伐鄭 十

九年冬齊人宋人陳人伐我西鄙 二十年冬齊人伐

戎 二十六年春公伐戎秋公會宋人齊人伐徐 二
十八年春王三月甲寅齊人伐衛秋荆伐鄭 三十年
冬齊人伐山戎 三十二年冬狄伐邢

僖公元年秋七月楚人伐鄭 三年冬楚人伐鄭 四

年春王正月遂伐楚次于陘秋及江人黃人伐陳 六

年夏公會齊侯宋公陳侯衛侯曹伯伐鄭圍新城 七

年春齊人伐鄭 八年夏狄伐晉 十年夏齊侯許男

伐北戎 十一年冬楚人伐黃 十五年秋七月齊師

曹師伐厲冬宋人伐曹 十七年春齊人徐人伐英氏

十八年春王正月宋公曹伯衛人邾人伐齊冬邢人

狄人伐衛 十九年秋衛人伐邢 二十年冬楚人伐

隨 二十一年秋宋公楚子陳侯蔡侯鄭伯許男曹伯

會于孟執宋公以伐宋冬公伐邾 二十二年春公伐

邾取須句夏宋公衛侯許男滕子伐鄭 二十三年春

齊侯伐宋圍緡秋楚人伐陳 二十四年夏狄伐鄭

二十六年夏齊人伐我北鄙衛人伐齊冬楚人伐宋圍

緡公以楚師伐齊取穀 二十八年春晉侯伐衛 三十三年夏公伐邾取鄆婁秋公子遂帥師伐邾冬晉人陳人鄭人伐許

文公元年夏晉侯伐衛衛人伐晉 二年冬晉人宋人陳人鄭人伐秦 三年春王正月叔孫得臣會晉人宋人陳人衛人鄭人伐沈沈潰夏秦人伐晉冬晉陽處父帥師伐楚以救江 四年秋晉侯伐秦 七年春公伐邾冬徐伐莒 九年三月楚人伐鄭 十年夏秦伐晉

十一年春楚子伐麇 十四年春邾人伐我南鄙叔彭
生帥師伐邾 十五年六月晉卻缺帥師伐蔡戊申入
蔡十有二月齊侯遂伐曹入其郭 十七年春晉人衛
人陳人鄭人伐宋夏齊侯伐我西鄙

宣公元年秋宋公陳侯衛侯曹伯會晉師于渠林伐鄭
冬晉人宋人伐鄭 二年春秦師伐晉 三年春楚子
伐陸渾之戎 四年春王正月公伐莒取向冬楚子伐
鄭 五年冬楚人伐鄭 七年夏公會齊侯伐萊 八

年夏晉師白狄伐秦冬楚師伐陳 九年夏齊侯伐萊

秋九月晉荀林父帥師伐陳冬楚子伐鄭 十年六月

宋師伐滕晉人宋人衛人曹人伐鄭秋公孫歸父帥師

伐邾取繹冬楚子伐鄭 十一年夏公孫歸父會齊人

伐莒 十二年冬宋師伐陳 十三年春齊師伐莒夏

楚子伐宋 十四年夏晉侯伐鄭 十五年夏秦人伐

晉 十八年春晉侯衛世子臧伐齊公伐杞

成公二年春齊侯伐我北鄙 三年春王正月公會晉

侯宋公衛侯曹伯伐鄭夏鄭公子去疾帥師伐許秋晉
卻克衛孫良夫伐廆咎如冬鄭伐許四年冬鄭伯伐
許秋楚公子嬰齊帥師伐鄭七年春吳伐郟秋楚公
子嬰齊帥師伐鄭八年冬叔孫僑如會晉士燮齊人
邾人伐郟九年秋晉欒書帥師伐鄭冬十有一月楚
公子嬰齊帥師伐莒庚申莒潰秦人白狄伐晉十年
五月公會晉侯齊侯宋公衛侯曹伯伐鄭十三年夏
五月公自京師遂會晉侯齊侯宋公衛侯鄭伯曹伯邾

人滕人伐秦 十四年秋鄭公子喜帥師伐許 十五

年夏楚子伐鄭 十六年秋公會尹子晉侯齊國佐邾

人伐鄭 十七年夏公會尹子單子晉侯齊侯宋公衛

侯曹伯邾人伐鄭冬公會單子晉侯宋公衛侯曹伯齊

人邾人伐鄭 十八年夏楚子鄭伯伐宋

襄公元年夏晉韓厥帥師伐鄭 二年春鄭師伐宋

三年春楚公子嬰齊帥師伐吳冬晉荀瑩帥師伐許

五年冬楚公子貞帥師伐陳 八年秋莒人伐我東鄙

冬楚公子貞帥師伐鄭 九年冬公會晉侯宋公衛侯

曹伯莒子邾子滕子薛伯杞伯小邾子齊世子光伐鄭

十年夏楚公子貞鄭公孫輒帥師伐宋晉師伐秦秋

莒人伐我東鄙公會晉侯宋公衛侯曹伯莒子邾子齊

世子光滕子薛伯杞伯小邾子伐鄭 十一年夏公會

晉侯宋公衛侯曹伯齊世子光莒子邾子滕子薛伯杞

伯小邾子伐鄭秋楚子鄭伯伐宋公會晉侯宋公衛侯

曹伯齊世子光莒子邾子滕子薛伯杞伯小邾子伐鄭

冬秦人伐晉 十二年春王二月莒人伐我東鄙圍台

十四年夏四月叔孫豹會晉荀偃齊人宋人衛北宮

括鄭公孫蠆曹人莒人邾人滕人薛人杞人小邾人伐

秦秋楚公子貞帥師伐吳 十五年夏齊侯伐我北鄙

圍成秋邾人伐我南鄙 十六年春齊侯伐我北鄙夏

五月叔老會鄭伯晉荀偃衛甯殖宋人伐許秋齊侯伐

我北鄙圍郕 十七年春宋人伐陳夏衛石買帥師伐

曹秋齊侯伐我北鄙圍桃高厚帥師伐我北鄙圍防冬

邾人伐我南鄙 十八年秋齊師伐我北鄙冬楚公子

午帥師伐鄭 十九年夏衛孫林父帥師伐齊 二十

年秋仲孫速帥師伐邾 二十三年秋齊侯伐衛遂伐

晉 二十四年夏楚子伐吳秋七月齊崔杼帥師伐莒

冬楚子蔡侯陳侯許男伐鄭 二十五年春齊崔杼帥

師伐我北鄙冬鄭公孫夏帥師伐陳十有二月吳子遏

伐楚門于巢卒 二十六年冬楚子蔡侯陳侯伐鄭

昭公四年秋七月楚子蔡侯陳侯許男頓子胡子沈子

淮夷伐吳 五年冬楚子蔡侯陳侯許男頓子沈子徐
人越人伐吳 六年秋楚薳罷帥師伐吳冬齊侯伐北
燕 十年秋七月季孫意如叔弓仲孫纁帥師伐莒

十二年冬楚子伐徐晉伐鮮虞 十五年秋晉荀吳帥
師伐鮮虞 十六年春晉侯伐徐 十九年春宋公伐
邾秋齊高發帥師伐莒 二十二年春齊侯伐莒 三
十二年夏吳伐越

定公四年秋晉士鞅衛孔圉帥師伐鮮虞 七年秋齊

國夏帥師伐我西鄙 八年夏齊國夏帥師伐我西鄙

十二年夏衛公孟彊帥師伐曹 十三年夏衛公孟

彊帥師伐曹 十五年夏鄭罕達帥師伐宋

哀公元年秋齊侯衛侯伐宋冬仲孫何忌帥師伐邾

三年夏宋樂髡帥師伐曹 五年夏齊侯伐宋晉趙鞅

帥師伐衛 六年春晉趙鞅帥師伐鮮虞吳伐陳冬仲

孫何忌帥師伐邾宋向巢帥師伐曹 七年秋公伐邾

八年春吳伐我 九年夏楚人伐陳秋宋公伐鄭

十年春公會吳伐齊夏宋人伐鄭冬楚公子結帥師伐
陳 十二年秋宋向巢帥師伐鄭 十三年夏楚公子
申帥師伐陳

蕙田案以上伐聲罪致討曰伐左氏傳曰有
鐘鼓曰伐

莊公十年二月公侵宋 十五年秋鄭人侵宋 二十
四年冬戎侵曹 二十九年夏鄭人侵宋

僖公二年冬十月楚人侵鄭 四年春王正月公會齊

侯宋公陳侯衛侯鄭伯許男曹伯侵蔡蔡潰冬十有二
月公孫茲帥師會齊人宋人衛人鄭人許人曹人侵陳
十三年春秋侵衛 十四年秋狄侵鄭 二十一年
春秋侵衛 二十六年春齊人侵我西鄙 二十八年
春晉侯侵曹 三十年夏狄侵齊秋介人侵蕭 三十
二年夏衛人侵狄 三十三年夏狄侵齊
文公四年夏狄侵齊 七年夏狄侵我西鄙 九年夏
狄侵齊 十年冬狄侵宋 十一年秋狄侵齊 十三

年冬狄侵衛 十五年夏齊人侵我西鄙十二月齊侯
侵我西鄙

宣公元年秋楚子鄭人侵陳遂侵宋冬晉趙穿帥師侵
崇 二年夏晉人宋人衛人陳人侵鄭 三年夏楚人
侵鄭秋赤狄侵齊 四年夏赤狄侵齊 六年春晉趙
盾衛孫免侵陳

成公二年冬楚子鄭師侵衛 六年春衛孫良夫帥師
侵宋秋仲孫蔑叔孫僑如帥師侵宋 八年春晉欒書

帥師侵蔡 十年春衛侯之弟黑背帥師侵鄭 十六

年夏四月鄭公子喜帥師侵宋 十七年春衛北宮括

帥師侵鄭 十八年冬楚人鄭人侵宋

襄公元年秋楚公子壬夫帥師侵宋 二年夏晉師宋

師衛甯殖侵鄭 八年夏鄭人侵蔡獲蔡公子變 十

一年夏鄭公孫舍之帥師侵宋 十二年冬楚公子貞

帥師侵宋 十四年夏莒人侵我東鄙 十九年秋七

月晉士匄帥師侵齊聞齊侯卒乃還 二十四年春仲

孫錫帥師侵齊

定公四年三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召陵侵楚 六年二月公侵鄭 七年秋齊人執衛行人北宮結以侵衛 八年春王正月公侵齊二月公侵齊秋七月晉士鞅帥師侵鄭遂侵衛九月季孫斯仲孫何忌帥師侵衛

哀公七年春宋皇瑗帥師侵鄭晉魏曼多帥師侵衛

十年夏晉趙鞅帥師侵齊 十三年秋魏曼多帥師侵

衛

蕙田案以上侵潛師掠境曰侵左氏傳曰無
鐘鼓曰侵胡傳曰先儒謂無名行師曰侵然
考諸五經皆稱侵伐在易謙之六五曰利用
侵伐征不服也書秦誓曰我武惟揚侵于之
疆詩皇矣曰依其在京侵自阮疆周官大司
馬九伐之法曰賊賢害民則伐之負固不服

則侵之而以為無名行師可乎蓋聲罪者鳴
鐘擊鼓整衆而行兵法所謂正也潛師者銜
枚臥鼓出人不意兵法所謂奇也

桓公十年冬十有二月丙午齊侯衛侯鄭伯來戰于郎
十二年十有二月丁未戰于宋 十三年春二月公
會紀侯鄭伯已巳及齊侯宋公衛侯燕人戰齊師宋師
衛師燕師敗績 十七年夏五月丙午及齊師戰于奚
莊公九年八月庚申及齊師戰于乾時我師敗績 二

十八年春王正月衛人及齊人戰衛人敗績

僖公十五年十有一月壬戌晉侯及秦伯戰于韓獲晉侯十八年五月戊寅宋師及齊師戰于贏齊師敗績二十二年秋八月丁未及邾人戰于升陘冬十有一月己巳朔宋公及楚人戰于泓宋師敗績二十八年夏四月己巳晉侯齊師宋師秦師及楚人戰于城濮楚師敗績

文公二年春王二月甲子晉侯及秦師戰于彭衙秦師

敗績 七年夏四月戊子晉人及秦人戰于令狐 十二年冬十有二月戊午晉人秦人戰于河曲

宣公二年春王二月壬子宋華元帥師及鄭公子歸生帥師戰于大棘宋師敗績獲宋華元 十二年夏六月乙卯晉荀林父帥師及楚子戰于泌晉師敗績

成公二年夏四月丙戌衛孫良夫帥師及齊師戰于新築衛師敗績六月癸酉季孫行父臧孫許叔孫僑如公孫嬰齊帥師會晉郤克衛孫良夫曹公子首及齊侯戰

于鞏齊師敗績 十六年夏六月甲午晦晉侯及楚子

鄭伯戰于鄢陵楚子鄭師敗績

昭公十七年冬楚人及吳戰于長岸

定公四年冬十有一月庚午蔡侯以吳子及楚人戰于

栢舉楚師敗績

哀公二年秋八月甲戌晉趙鞅帥師及鄭罕達帥師戰

于鐵鄭師敗績

蕙田案以上戰左氏傳曰皆陳曰戰大崩曰

敗績

隱公十年六月壬戌公敗宋師于菅

莊公十年春王正月公敗齊師于長勺夏六月公敗宋師于乘丘秋九月荆敗蔡師于莘以蔡侯獻舞歸 十一年夏五月戊寅公敗宋師于鄆

僖公元年九月公敗邾師于偃冬十月壬午公子友帥師敗莒師于鄆獲莒挐 十五年冬楚人敗徐于婁林 三十三年夏四月辛巳晉人及姜戎敗秦師于殽秋

晉人敗狄于箕

文公十一年冬十月甲午叔孫得臣敗狄于鹹

成公十二年秋晉人敗狄于交剛

昭公元年六月晉荀吳帥師敗狄于大鹵四年秋七

月戊辰叔弓帥師敗莒師于蚡泉二十三年七月戊

辰吳敗頓胡沈蔡陳許之師于雞父胡子髡沈子逞滅

獲陳夏齧

定公十四年五月於越敗吳于檣李

蕙田案以上敗左氏傳曰凡師敵未陳曰敗

某師

哀公九年春宋皇瑗帥師取鄭師于雍丘 十三年春鄭罕達帥師取宋師于嵎

蕙田案以上取左氏傳曰覆而敗之曰取某師

襄公二十三年冬齊侯襲莒

蕙田案以上襲左氏傳曰輕曰襲杜氏謂掩

其不備也

莊公三年冬公次于滑 八年春王正月師次于郎以
俟陳人蔡人 十年夏六月齊師宋師次于郎 十五
年三月遂次于匡

文公十年冬楚子蔡侯次于厥貉

襄公元年夏仲孫蔑會齊杼曹人邾人杞人次于鄆

定公九年秋齊侯衛侯次于五氏 十三年春齊侯衛

侯次于垂葭 十五年夏齊侯衛侯次于渠蔭

蕙田案以上次左氏傳曰凡師一宿為舍再宿為信過信為次

莊公十年冬十月齊師滅譚譚子奔莒 十三年夏六月齊人滅遂

僖公二年夏虞師晉師滅下陽 五年秋八月楚人滅弦弦子奔黃 十年春秋滅溫溫子奔衛 十二年夏楚人滅黃 十七年夏滅項 二十五年春王正月丙午衛侯燬滅邢 二十六年秋楚人滅夔以夔子歸

文公四年秋楚人滅江 五年秋楚人滅六 十六年
秋楚人秦人巴人滅庸

宣公八年夏楚人滅舒蓼 十二年冬十有二月戊寅
楚子滅蕭 十五年六月癸卯晉師滅赤狄潞氏以潞
子嬰兒歸 十六年春王正月晉人滅赤狄甲氏及留
吁

成公十七年冬楚人滅舒庸

襄公六年秋莒人滅鄆冬十有二月齊侯滅萊 十年

夏五月甲午遂滅偃陽 二十五年秋楚屈建帥師滅舒鳩

昭公四年秋七月遂滅賴 八年冬十月壬午楚師滅陳 十一年冬十有一月丁酉楚師滅蔡執蔡世子有以歸用之 十三年冬吳滅州來 十七年八月晉荀吳帥師滅陸渾之戎 二十四年冬吳滅巢 三十年冬十有二月吳滅徐徐子章禹奔楚

定公四年四月庚辰蔡公孫姓帥師滅沈以沈子嘉歸

殺之 六年春王正月癸亥鄭游速帥師滅許以許男
斯歸 十四年二月辛巳楚公子結陳公孫佗人帥師
滅頓以頓子牂歸 十五年二月辛丑楚子滅胡以胡
子豹歸

蕙田案以上滅夷其社稷曰滅大邑用大師
取之亦曰滅

隱公二年夏五月莒人入向無駭帥師入極 五年秋
衛師入郕 十年秋宋人衛人入鄭冬十月齊人鄭人

入郕 十一年秋七月壬午公及齊侯鄭伯入許

桓公元年九月入杞

莊公十四年秋七月荆入蔡

閔公二年十有二月狄入衛

僖公二十年夏鄭人入滑 二十七年秋八月乙巳公

子遂帥師入杞 二十八年三月丙午晉侯入曹執曹

伯畀宋人 三十三年春王二月秦人入滑

文公五年夏秦人入郛

宣公十一年冬十月丁亥楚子入陳

成公七年秋吳入州來 九年冬楚人入鄆

襄公二十五年六月壬子鄭公孫舍之帥師入陳

昭公十八年六月邾人入鄆

定公四年十有一月庚辰吳入郢 五年夏於越入吳

哀公七年八月己酉入邾以邾子益來 八年春王正

月宋公入曹以曹伯陽歸 十三年夏於越入吳

蕙田案以上入左氏傳曰弗地曰入謂破其

地而不能有也

莊公八年夏師及齊師圍郕郕降于齊師

僖公六年秋楚人圍許十九年秋宋人圍曹二十

五年秋楚人圍陳二十七年冬楚人陳侯蔡侯鄭伯

許男圍宋二十八年冬諸侯遂圍許曹伯襄復歸于

曹遂會諸侯圍許三十年秋晉人秦人圍鄭三十

一年冬狄圍衛

文公三年秋楚人圍江十二年夏楚人圍巢

宣公三年秋宋師圍曹 九年冬宋人圍滕 十二年

春楚子圍鄭 十四年秋九月楚子圍宋

成公三年秋叔孫僑如帥師圍棘 九年冬鄭人圍許

襄公元年春仲孫蔑會晉欒黶宋華元衛甯殖曹人莒

人邾人滕人薛人圍宋彭城 四年冬陳人圍頓 七

年冬十月楚公子貞帥師圍陳 十八年冬十月公會

晉侯宋公衛侯鄭伯曹伯莒子邾子滕子薛伯杞伯小

邾子同圍齊

昭公十一年夏四月楚公子棄疾帥師圍蔡 十三年
春叔弓帥師圍費 二十三年春晉人圍郊 二十六
年夏公圍成

定公四年秋楚人圍蔡 五年冬晉士鞅帥師圍鮮虞

六年冬季孫斯仲孫忌帥師圍鄆 十年夏晉趙鞅

帥師圍衛叔孫州仇仲孫何忌帥師圍郕秋叔孫州仇

仲孫何忌帥師圍郕 十二年十有二月公圍成

哀公元年春王正月楚子陳侯隨侯許男圍蔡 三年

春齊國夏衛石曼姑帥師圍戚冬叔孫州仇仲孫何忌
帥師圍邾 七年秋宋人圍曹

蕙田案以上圍環而攻之曰圍

莊公六年春王正月壬子突救衛 二十八年秋公
會齊人宋人救鄭

閔公元年春王正月齊人救邢

僖公元年春王正月齊師宋師曹伯次于聶北救邢

六年秋諸侯遂救許 十五年三月公孫敖帥師及諸

侯之大夫救徐 十八年夏師救齊

文公九年三月公子遂會晉人宋人衛人許人救鄭

宣公元年秋晉趙盾帥師救陳 九年冬晉卻缺帥師

救鄭 十二年冬衛人救陳

成公六年冬晉欒書帥師救鄭 七年秋公會晉侯齊

侯宋公衛侯曹伯莒子邾子杞伯救鄭

襄公五年冬公會晉侯宋公衛侯鄭伯齊世子光救陳

十年冬楚公子貞帥師救鄭 十二年春王二月季

孫宿帥師救台遂入鄆 十五年夏公救成至遇
二十三年八月叔孫豹帥師救晉次于雍榆

哀公七年冬鄭駟宏帥師救鄭 十年冬吳救陳

蕙田案以上救赴難曰救左氏傳曰凡書救
善之也

莊公十有八年夏公追戎于濟西

僖公二十六年春公追齊師至鄆弗及

蕙田案以上追敵已去而躡之曰追

僖公二十八年春公子買戍衛不卒戍刺之

襄公五年冬戍陳 十年冬戍鄭虎牢

蕙田案以上戍以兵守之曰戍

又案春秋書戰事為例十有三雖未盡合周禮然猶近古與後世專以殺人為功者有間

僖公二十六年公子遂如楚乞師

成公十三年春晉侯使卻錡來乞師 十六年夏晉侯

使欒黶來乞師 十七年秋九月晉侯使荀瑩來乞師

十八年冬晉侯使士魴來乞師

蕙田案以上乞師

右用師名目

書武成丁未祀于周廟邦甸侯衛駿奔走執豆籩越三日庚戌柴望大告武成

真氏德秀曰此武功成告祖及天之禮先祖後郊者鄭氏謂其自近始蔡氏以為由親而尊竊以謂武王伐商受命于文考及其成功也先告焉因告文考遂及七世之廟故又三日然後以所以成文考之志者告天焉蓋武王成文考之志而文考又所以成天之志也豈以遠近為先後哉

周禮春官大司樂王師大獻則令奏愷樂

注大獻獻捷于祖愷樂獻

功之樂鄭司農說以春秋晉文公敗楚于城濮傳曰振旅愷以入于晉疏鄭志趙商問大司馬云師有功則

愷樂獻于社春官大司樂云王師大獻則令奏愷樂注云大獻獻捷于祖不達異意答曰司馬云師大獻則獻

社以軍之功故獻于社大司樂宗伯之屬宗伯主于宗廟之禮故獻于祖也

樂師凡軍大獻教愷歌遂倡之

注鄭司農云樂師主倡也疏大獻者謂師克

勝獻捷于祖廟也云教愷歌者愷謂愷詩師還未至之時預教瞽矇入祖廟遂使樂師倡道為之故云遂倡之

鄭氏鐸曰王師大獻令奏愷樂則王親征之師故大司樂合之軍大獻教愷歌遣將出軍而歸故樂師教

之又倡之異尊卑

李氏嘉會曰愷歌歌于堂上愷樂作于堂下二者相應愷歌在前樂師倡之

鑄師軍大獻則鼓其愷樂

疏軍大獻謂獻捷于祖

詩周頌酌序酌告成大武也

於鑠王師遵養時晦時純熙矣是用大介我龍受之蹻蹻王之造載用有嗣實維爾公允師

孔叢子問軍禮然後鳴金振旅有司徧告捷于時所有事之山川既至舍于國外三日齊以特牛親格于祖禰然後入設奠以反主若主命則卒奠斂玉埋之

於廟兩階間

唐開元禮凱旋告廟陳俘馘于南門外北面西上軍實
陳于後其告奠之禮皆與告禮同解嚴未解嚴前一日
本司各隨職供辦尚舍奉御座于太極殿中楹間南向
如常守宮設文武百官次于東西朝堂奉禮于東西朝
堂設文武官版位如初典儀設位于殿廷文東武西皆
重行北向相對為首設典儀位于東階革輅旌旗之屬
于殿廷其日平明諸衛各勒所部屯門列仗百官服袴

褶戎服皆集朝堂晝漏上水五刻侍中版奏請中嚴劬
戟以次列于殿廷上水七刻典謁引羣官以次入就位
上水十刻應奉迎之官詣閣奏迎侍中版奏外辦皇帝
服通天冠絳紗袍御輿以出曲直華蓋警蹕如常皇帝
出自西房即御座侍臣夾侍如常典儀稱再拜贊者承
傳羣官皆再拜通事舍人以次引羣官出侍中跪奏稱
禮畢俛伏興還侍位皇帝降座御輿入自東房侍臣從
至閣如常

通典武德元年十一月秦王平薛仁果凱旋獻于太廟
四年七月秦王平東都被黃金甲陳鐵馬一萬甲士三
萬以王世充竇建德及隋文物輦路獻捷于太廟

貞觀四年三月李靖俘頡利可汗獻捷于太廟

遼史禮志下城克敵班師以所獲牡馬羊各一祭天地
明會典軍凱還皇帝率諸將以凱樂俘馘陳于廟社門
外告畢以俘馘付刑部協律郎導樂以退其告祭用三
獻禮儀與出師同

蕙田案漢唐以下凱還儀節歷代不同未便
細分如此段告廟而兼之告社是也今一以
經為主此段入告廟即不復入告社餘倣此
又案此凱旋告天地宗廟

周禮夏官大司馬若師有功則左執律右秉鉞以先愷

樂獻于社

注功勝也律所以聽軍聲鉞所以為將威也
先猶道也兵書曰愷獻于社獻功于社也司

馬法曰得意則愷
樂愷歌示喜也

鄭氏鈔曰軍行必聽同律而鉞者大將所執也有功
則執律者示師出以律而取勝也陽六為律左陽也

故左執之鉞所以主殺陰也右亦陰也故右秉之

春官大祝大師軍歸獻于社則前祝反行舍奠

注舍奠之禮所

以告至

鄭氏鐸曰軍有功歸而獻于社大祝處前告神

孔叢子問軍禮反社主如初迎之禮

蕙田案此凱旋告社稷

禮記王制天子出征執有罪反釋奠于學以訊馘告

注釋

菜羹幣禮先師也又曰在類獻馘

訊馘所生獲斲耳者詩曰執訊獲醜疏出師征伐執此有罪之人還反而

歸釋菜奠幣于學以可言問之
訊截左耳之馘告先聖先師也

禮經補逸汪氏克寬曰訊者問其首惡馘者截其左
耳夫執訊獲醜而反舍奠于先聖先師以是告之者
蓋始出征受成于學今師還以武功告成于文德之
地明不專恃乎威戮而必任之以德禮也昔僖公在
武頌之者亦以此歟

詩魯頌泮水矯矯虎臣在泮獻馘淑問如臯陶在泮獻

囚

詩緝嚴氏粲曰古者受成于學故出征執有罪反釋
奠于學以訊馘告詩人因其泮宮可以為獻功之地
而頌禱之耳

孔叢子問軍禮舍奠于帝學以訊馘告大亨于羣吏
用備樂

蕙田案此凱旋釋奠于學

詩小雅出車序出車勞還率也

我出我車于彼牧矣自天子所謂我來矣召彼僕夫謂
之載矣王事多難維其棘矣我出我車于彼郊矣設
此旒矣建彼旒矣彼旛旒斯胡不旆旆憂心悄悄僕夫
况瘁王命南仲往城于方出車彭彭旂旒央央天子

命我城彼朔方赫赫南仲玁狁于襄 昔我往矣黍稷
方華今我來思雨雪載塗王事多難不遑起居豈不懷
歸畏此簡書 嘒嘒草蟲趯趯阜螽未見君子憂心忡
忡既見君子我心則降赫赫南仲薄伐西戎 春日遲
遲卉木萋萋倉庚喈喈采芣祁祁執訊獲醜薄言還歸
赫赫南仲玁狁于夷

蕙田案此凱旋勞還率

周禮春官眡瞭賓射奏其鐘鼓鑿愷獻亦如之

注凱獻
功愷

樂也杜子春讀鑿為憂戚之戚謂戒守鼓也擊鼓聲疾
數故曰戚疏鑿謂夜戒守之鼓愷獻謂戰勝獻俘之
時作愷樂二者皆
眠瞭奏其鐘鼓

春秋僖公二十八年左氏傳晉侯獻楚俘于王駟介百
乘徒兵千鄭伯傅王用平禮也已酉王享醴命晉侯宥
王命尹氏及王子虎內史叔興父策命晉侯為侯伯賜
之大輅之服戎輅之服彤弓一彤矢百旅弓矢千鉅鬯
一卣虎賁三百人曰王謂叔父敬服王命以綏四國糾
遯王憑晉侯三辭從命曰重耳敢再拜稽首奉揚天子

之丕顯休命

真氏德秀曰此古人獻俘策命之禮見于春秋者

秋七月丙申振旅愷以入于晉獻俘授馘飲至大賞徵會討貳殺舟之僞以徇于國民於是大服

真氏德秀曰此雖春秋時事而亦可見三代振旅凱旅之遺制

昭公十年左氏傳季平子伐莒取郟獻俘

十七年左氏傳晉荀吳滅陸渾獻俘于文宮

隋書高祖本紀開皇九年春正月陳國平四月乙巳三

軍凱入獻俘于太廟

唐書高祖本紀武德元年十一月癸亥秦王世民俘薛仁果以獻 四年五月壬戌秦王世民敗竇建德于虎牢執之七月甲子秦王世民俘王世充以獻

唐會要武德四年秦王世民平東都被黃金甲乘戎輅李世勣等二十五將從其後陳鐵騎一萬甲士三萬前後部鼓吹俘王世充竇建德及隋器物輦輅獻于太廟

蕙田案唐秦王破宋金剛李勣平高麗皆凱

歌入京師其樂歌則有破陣樂應聖朝等篇
其奏樂則有饒歌鼓吹二部笛簫簞簫笳
鼓等器至廟社但陳列于門外不奏歌曲俟
告獻禮畢復奏曲如儀以廟社尊嚴之地饒
吹諠譁恐乖肅敬故不奏曲

唐書太宗本紀貞觀四年三月李靖俘突厥頡利可汗
以獻 十四年十二月丁酉侯君集俘高昌王以獻

高宗本紀永徽元年九月高品俘突厥車鼻可汗以獻

王絃傳絃字方慶神功初清邊道大總管武攸宜破契丹凱還且獻俘內史王及善以孝明帝忌月請鼓吹備而不作方慶曰晉穆帝納后當康帝忌月時以為疑荀訥謂禮有忌日無忌月世用其言臣謂軍方大凱作樂無嫌詔可

玄宗本紀開元二十年正月信安郡王禕為河東河北道行軍副元帥以伐奚契丹五月戊申忠王浚俘奚契丹以獻

宋史太祖本紀建隆元年六月辛未拔澤州筠赴火死
丁亥筠子守節以城降九月甲子歸太原俘

禮志宋制親征納降獻俘皆遣官奏告天地宗廟社稷
諸陵嶽瀆山川官觀在京十里內神祠其儀用犧尊邊
豆各一實以酒脯醢官寺以素饌時果代用祝幣行一
獻禮建隆元年太祖平澤潞仍祭祔廟泰山城隍用此
禮

太祖本紀乾德三年春正月乙酉蜀王孟昶降

禮志受降獻俘太祖平蜀孟昶降詔有司約前代儀制
為受降禮昶至前一日設御座仗衛于崇元殿如元會
儀至日大陳馬步諸軍于天街左右設昶及其官屬素
案席褥于明德門外表案于橫街北通事舍人引昶及
其官屬素服紗帽北向序立昶跪奉表授閤門使復位
待命表至御前侍臣讀訖閤門使承旨出昶等俯伏通
事舍人掖昶起官屬亦起宣制釋罪昶等再拜呼萬歲
衣庫使導所賜襲衣冠帶陳于前昶等又再拜跪受改

服乘馬至昇龍門下馬官屬至啟運門下馬就次帝常服升坐百官先入起居班立閣門使引昶等入舞蹈拜謝召昶升殿閣門使引自東階升宣撫使承旨安撫之昶至御座前躬承問訖還位與官屬舞蹈出中書率百官稱賀遂宴近臣及昶于大明殿

太祖本紀開寶四年春正月己丑潘美克廣州俘劉鋹廣南平五月乙未朔御明德門受劉鋹俘釋之

禮志嶺南平劉鋹就擒詔有司撰獻俘禮鋹至上御明

德門列仗衛諸軍百官常服班樓前別設獻俘位於東
西街之南北向其將校位于獻俘位前北上西向有司
率武士係銀等白練露布前引至太廟西南門銀等並
下馬入南神門北向西上立監將校官次南立俟告禮
畢于西南門出乘馬押至大社如上儀乃押至樓南御
路之西下馬立俟獻俘將校戎服帶刀攝侍中版奏中
嚴百官班定版奏外辦帝常服御座百官舞蹈起居畢
通事舍人引銀就獻俘位將校等詣樓前舞蹈訖次引

露布案詣樓前北向宣付中書門下如宣制儀通事舍人跪受露布轉授中書門下轉授攝兵部尚書次攝刑部尚書詣樓前跪奏以所獻俘付有司上召張詰責張伏地待罪詔誅其臣襲澄樞等特釋張縛與其弟保興等罪仍賜襲衣冠帶鞞笏器幣鞍馬各服其服列謝樓下百官稱賀畢放仗如儀

太祖本紀開寶八年十一月乙未曹彬克昇州俘其國主煜江南平九年春正月辛未御明德門見李煜于樓

下不用獻俘儀

禮志南唐平帝御明德門露布引李煜及其子弟官屬素服待罪初有司請如獻劉鋹帝以煜奉正朔非若鋹拒命寢露布弗宣遣閣門使承制釋之

太宗本紀太平興國四年五月甲申劉繼元降北漢平禮志太宗征太原劉繼元降帝幸城北陳兵衛張樂宴從臣於城臺繼元率官屬素服臺下遣閣門使宣制釋罪召繼元親勞之從臣詣行宮稱賀時以在軍中故不

備禮繼元至京師詔告獻太廟前一日所司陳設如常
告廟儀告日黎明博士引太尉就位通事舍人引繼元
西階下東向立其官屬重行立贊者贊太尉再拜訖博
士引就盥爵如常儀詣東階解劍脫舄升第一室進奠
再拜太祝跪讀祝文訖又再拜通事舍人引繼元及官
屬詣室前西階下北向立舍人贊云皇帝親征收復河
東僞主劉繼元及僞命官見贊者曰再拜訖退位次至
第二第三第四第五室皆如第一室博士引太尉降階

佩劍納履位贊者曰再拜太尉與繼元等皆再拜退焚
祝版於齋坊繼元既命以官故不稱倖焉

寧宗本紀開禧三年春正月甲午吳曦僭位于興州二
月四川宣撫副使司隨軍轉運安丙及興州中軍正將
李好義監四川總領所興州合江倉楊巨源等共誅吳
曦傳首詣行在獻于廟社

禮志開禧三年三月四川宣撫副使安丙函逆臣吳曦
首并違制剋造法物所受金國加封蜀王詔及金印來

獻四月三日禮部太常寺條具獻馘典故俟逆曦首函至日臨安府差人防守殿前司差甲士二百人同大理寺官監引赴都堂審驗奏獻太廟別廟差近上宗室南班奏獻太社太稷差侍從官各前一日赴祠所致齋至日行奏獻之禮大理寺殿前司計會行禮時刻監引首函設置以俟奏獻禮畢臬于市三日付大理寺藏于庫宋政和五禮新儀師旋奏凱某日大將勒所部兵衛執俘陳於都門外鼓吹令丞押凱樂分前後二部並其次

第陳列將入都門鼓吹振作迭奏樂歌

其詞隨時撰述行至

太廟及太社門工人下馬陳列于門外奏歌曲俟告獻
禮畢復導引奏曲至宣德門樓前兵仗外二十步樂工
皆下馬徐行前進兵部尚書於中路前導至樓下次協
律郎二人公服執麾分導鼓吹令引樂工等至獻俘位
之南面重行立定大司樂于樂工之前俛伏跪奏具官
臣某言請奏凱樂協律郎舉麾鼓吹大作徧奏樂曲協
律郎偃麾樂止大司樂跪奏臣某言奏凱樂畢兵部尚

書大司樂退協律郎導鼓吹令引樂工等並於兵仗外序立次引復入獻如別儀獻俘前期殿中監帥其屬尚舍設御座于宣德門樓上前楹當中南向又設御幄于御座之右北儀鸞司分設文武百僚及獻俘將校次于樓下之左右隨地之宜其日未明尚書兵部率其屬陳列黃麾大仗于樓前東上閣門御史臺太常寺設文武百僚等班位並如受降之儀又設獻俘位于樓前少南又設獻俘將校位于獻俘位之北刑部尚書奏請獻俘

位又於其北並北向門下侍郎受露布于樓下之東兵部尚書位於其南並西向文武百僚諸方客使各赴樓前就位次皇帝常服出內東門先知客省事以下六尚局應奉官祇應武功大夫至保義郎知內侍省事以下帶御器械官鬪班立定屏門開先禁衛諸班親從等迎駕自贊常起居次知客省事以下知內侍省事以下常起居次樓上侍立知樞密院官翰林學士承旨宣名常起居貯廊南管軍臣寮宣名常起居訖

管軍臣僚導從駕至僚門導赴

門下侍立皇帝乘輿升宣德門樓降輿歸御幄禮直官舍人

分引文武百僚就位立定樓東上閤門進班齊牌以紅
條袋引升樓上東上閤門附內侍進訖內侍承旨索扇
扇合皇帝即御座簾捲內侍又贊扇扇開侍衛如常儀
諸班親從并裏圍人等迎駕自贊常起居次舍人贊執
儀將士常起居次禮直官舍人分別文武百僚橫行北
向贊曰拜在位官皆再拜搢笏舞蹈三呼萬歲又再拜
班首奏聖躬萬福又再拜訖禮直官舍人分引各就東

西序立次樓上侍臣承旨進詣樓前宣引獻俘宣訖將校執俘就北面位立定東上閣門官引露布案于樓前北向稱宣訖附門下省東上閣門官案西東向立引門下侍郎于案南北向搢笏跪提點承受闕耶仁首承受于案上捧露布躬授門下侍郎俛伏興置案于近北東上閣門官隨案退門下侍郎以露布傳授通事舍人折方南方文武班南宣宣訖通事舍人捧露布跪授門下侍郎轉授兵部尚書次禮直官引刑部尚書進當樓前俛伏

跪進奏具官臣某言某使某官某以某處所俘執獻請
付所司奏訖復位以俟旨合就刑者立于西廂東向禮
直官引大理卿受之詣法場准式若上命釋罪者通事

舍人詣樓前南向宣有勅釋縛釋縛訖俟命又東上閣

門官宣制釋放

其詞學士院
隨事撰述

宣訖通事舍人贊謝恩拜

再拜隨拜三稱萬歲訖於東廂西向序立

如有賜物即
臨時承旨宣

賜贊謝恩如
受降之儀

贊樓上侍郎立官稱賀再拜禮直官舍人

分引文武百僚橫行北向立定贊者曰拜在位官皆再

拜班首少前俛伏跪稱賀訖

其詞中書省隨事撰述

俛伏興退復

位贊者曰拜在位官皆再拜搢笏舞蹈三稱萬歲又再

拜東上閣門官進詣樓前承旨就班首宣曰有制贊者

曰拜在位官皆再拜宣答訖

其詞學士院隨事撰述

贊者曰拜在

位官皆再拜搢笏舞蹈三稱萬歲又再拜分班樓上樞

密院少進前俛伏跪奏稱具官臣某言禮畢俛伏興退

復位內侍承旨索扇扇合皇帝降座簾降內侍省贊扇

開所司承旨放仗樓下鳴鞭贊文武百僚再拜訖退皇

帝乘輿還內如常儀

明典禮志洪武四年秋七月乙丑指揮萬德送明昇並降表至京師初上聞大軍下蜀命中書集六部太常翰林院定議受降等禮省部請如宋太祖乾德三年受蜀主孟昶降禮上御奉天門昇等于午門外跪進待罪表侍儀使捧表入宣表官宣讀訖承制官出傳制官出傳制賜衣服冠帶昇等皆俯伏于地侍儀舍人掖昇起其屬官皆起跪聽宣制釋罪昇等五拜三呼萬歲承制官

傳制賜衣服冠帶侍儀舍人引昇入丹墀中四拜侍儀
使傳旨昇跪聽宣諭俯伏四拜三呼萬歲又四拜出丞
相率文武百官行賀禮上曰明昇與孟昶不同昶專治
國政所為奢縱昇年幼事由臣下宜免其叩頭伏地上
表請罪之禮是日昇及其官屬朝見百官稱賀制授昇
為歸義侯賜冠帶衣服及居第于京師

明會典永樂四年定獻俘前期兵部官以露布奏聞禮
部告示文武百官具朝服并坊廂里老人等行慶賀禮

先一日內官設御座于午門樓前楹正中是日錦衣衛設儀仗于午門前御道之東西教坊司陳大樂于御道南東西北向鴻臚寺設贊禮二人于午門前東西相向承制官一員位于午門前東立西向設宣制位于午門東稍南西向設文武官及諸蕃使客人等侍立位于樓前御道南文東武西相向設露布案于午門前御道東設宣露布官一員展露布官二員及刑部獻俘官位于午門前御道東稍南西向設獻俘將校位于午門前御

道西稍南北向設進露布官位于御道南稍東引禮引
文武官東西序立引進露布官捧露布置于案退就位
獻俘將校引俘列于午門前西邊武班之後以俟上常
服御奉天門鐘聲止鴻臚寺跪奏請上乘輿樂作至午
門樓上陞座樂止鳴鞭訖贊禮贊進露布官四拜樂作
平身樂止贊進露布樂作執事者舉案置于中道樂止
贊宣露布官跪宣露布官與展露布官詣案前取露布
跪宣訖仍置於案退贊俯伏興樂作四拜平身樂止執

事者舉案復置于御道東引禮引進露布官退贊獻俘獻俘將校引俘至獻俘位北向立定俘跪于前刑部官詣樓前中道跪奏云具官臣某奏云某官以某處所俘獻請付所司伺旨有合受刑者立于西廂東向以付刑官若上釋罪承制官詣御道跪請制由東街南行至宣制位西向立稱有制所獲俘囚咸赦其罪宣旨曰有敕釋縛所釋之俘叩頭訖將校引俘起引禮贊文武百官入班北向立唱排班班齊致詞官詣中道跪致詞云云

賀訖贊鞠躬樂作五拜三叩頭興平身樂止鴻臚寺跪
奏禮畢樂作駕興樂止百官以次退次日行開讀禮如
常儀第三日文武百官上表行慶賀禮如常儀

凡各處奏捷鴻臚寺于早朝將差來人役引至御前宣
讀捷音隆慶六年令擇吉宣捷至日不奏事次日行慶
賀禮

王圻續通考獻俘儀注穆宗隆慶四年十二月禮部奏
是日文武百官具朝服詣午門前行慶賀禮先一日內

官設御座于午門樓前楹正中是日早錦衣衛設儀仗于午門前御道之東西向教坊司陳大樂于御道南東西相向鴻臚寺設贊禮二人于午門前東西相向設文武官侍立位于樓前御道南文武西相向及刑部獻俘官位于午門前御道東稍南西向設獻俘將校位于午門前御道西稍南北向引禮引文武官東西序立獻俘將校引俘列于午門前西邊文武班之後伺候上常服御皇極門鐘聲止鴻臚寺跪奏請上乘輿樂作至午

門樓上陞座樂止鳴鞭訖鴻臚寺官宣奏畢贊獻倂將
校引倂至獻倂位北向立定倂跪于將校之前刑部官
詣樓前中道跪奏云具官臣某奏云某官以某處所倂
獻請付所司候旨傳下刑部官承旨訖即同將校押出
施行文武百官入班北向立唱排班班齊致詞官詣中
道跪致詞稱賀訖贊鞠躬樂作五拜三叩頭興平身樂
止鴻臚寺官跪奏禮畢樂作駕興樂止百官以次退

湧幢小品上御午樓獻倂奏事畢上曰拿去廷臣尚

未聞聲左右勲戚接者二遞為四乃有聲又為八為十六漸震為三十二最下則大漢將軍三百六十人齊聲如轟雷矣

蕙田案以上獻俘

通典後魏每攻戰克捷欲天下聞知乃書帛建于漆竿上名為露布彭城王勰曰露布者布于四海露之耳目蓋謂獻捷之書不封而以告諭于天下也

隋文帝開皇中詔太常卿牛弘太子庶子裴政撰宣露

布禮及九年平陳元帥晉王以驛上露布兵部奏請依
新禮集百官四方客使等並赴廣陽門外朝服朝衣各
依其列內史令稱有詔在位者皆拜宣記蹈舞者三又
拜而罷

唐開元禮宣露布其日守官量設羣官次露布至兵部
侍郎奉以奏聞仍承制集文武羣官客使於東朝堂羣
官客使至俱就次各服其服奉禮設羣官版位于東朝
堂之前近南文東武西重行北向相對為首又設客使

各如常儀設中書令于羣官之北南面量時刻吏部兵部贊羣官客使出次謁者贊引就位立定中書令受露布置于案令史二人絳公服對舉之典謁者引中書令舉案者從之出就南面位持案者立于中書令西南東面立定持案者進中書令取露布持案者退復位中書令稱有制羣官客使皆拜再拜中書令宣露布訖羣官客使又再拜皆舞蹈訖又再拜謁者引兵部尚書進中書令前受露布退復位兵部侍郎前受之典謁者引中書

令入謁者引羣官客使各還次

郭正域典禮志永樂四年定前期兵部官以露布奏聞
文武百官具朝服先一日內官設御座于午門樓前楹
正中是日早錦衣衛設儀仗于午門前御道之東西教
坊司樂陳大樂于御道西南東西相向鴻臚寺設贊禮
二人于午門前東西相向承制官一人位于午門前西
向設宣制位于午門東稍南西向設文武官及諸蕃使
客人等侍立位于樓前御道南東西向設露布案于午

門前御道東設宣露布官一展宣露布官二及刑部獻
俘官位于午門前御道東西向設獻俘將校位于午門
前御道西北向設進露布官位于御道南稍東引禮導
文武官東西序立引進露布官捧露布置于案退就位
獻俘將校引俘列于午門前武班之後上常服御奉天
門鐘聲止鴻臚寺跪奏請上乘輿樂作至午門樓上陞
座樂止鳴鞭訖贊禮贊進露布官四拜樂作平身樂止
贊進露布樂作執事者舉案置于中道樂止宣露布贊

獻俘獻俘將校引俘至北向立俘跪于前刑部官詣樓
前中道跪奏曰某官臣某奏曰某官以某處所獻俘請
付所司伺旨有合受刑者立于西廂東向以付刑官若
上釋罪承制官詣御道跪請制由東街南行至東制位
西向立稱旨曰所獲俘囚咸赦其罪宣旨曰有勅釋縛
所釋之俘將校引俘起文武百官入班北向立致詞官
跪致詞賀訖樂作五拜三叩首興樂止樂作駕興百官
以次退次日行開讀禮如常儀第三日文武百官上表

行慶賀禮如常儀

潘昂霄金石例露布之名始于漢案光武紀注漢制
度曰制詔三公皆璽封尚書令印重封露布州郡祭
祀志注引東觀書有司奏孝順號露布奏可又鮑昱
詣尚書封胡降檄曰故事通官文書不著姓又當司
徒露布李雲露布上書注謂不封也魏改元景初詔
曰司徒露布咸使聞知蜀漢建興五年春伐魏詔曰
丞相某露布天下此皆非將帥獻捷所用後魏王肅

獲賊二三皆為露布韓顯宗有高曳長縑虛張功捷
之譏孝文稱傳脩期下馬作露布齊神武破芒山軍
為露布杜弼即書絹不起草唐制下之通上其制有
六三曰露布兵部侍郎奉以奏聞集羣官東朝堂中
書令宣布張九齡為崑丘道記室平龜茲露布為士
所稱于公異為昭討府掌書記朱泚平露布曰臣既
肅清宮禁祇奉寢園鐘簾不移廟貌如故德宗咨歎
焉東晉未有露布隆興初以晉破苻堅命題似有可

疑然文章緣起曰漢賈洪為馬超伐曹操作而魏志
注謂虞松從司馬宣王征遼東及破賊作露布隋志
有魏武帝露布文九卷世說云桓溫北征令袁宏倚
馬前作露布手不輟筆俄成七紙則魏晉已有之嘗
考宋朝王元之擬李靖平突厥露布此擬題之始歟
蕙田案以上宣露布

又案獻俘與宣露布二事相連分而實合但
獻俘見于經宣露布起于後世故以獻俘居

前次宣露布附焉

右凱旋告祭獻俘

宣露布附

春秋成公二年左氏傳晉侯使鞏朔獻齊捷于周王弗見使單襄公辭焉曰蠻夷戎狄不式王命淫湎毀常王命伐之則有獻捷王親受而勞之所以懲不敬勸有功也兄弟甥舅侵敗王略王命伐之告事而已不獻其功所以敬親暱禁淫慝也今叔父克遂有功于齊而奸先王之禮余雖欲于鞏伯其敢廢舊典以忝叔父夫齊甥

舅之國也而太師之後也寧不亦淫從其欲以怒叔父抑豈不可諫誨士莊伯不能對王使姜于三吏禮之如侯伯克敵使大夫告慶之禮

二年左氏傳鄭皇成如楚獻捷

襄公二十五年左氏傳鄭伐陳入之子產獻捷于晉戎服將事晉人問陳之罪對曰昔虞閼父為周陶正以服事我先王我先王賴其利器用也與其神明之後也庸以元女大姬配胡公而封諸陳以備三恪則我周之自

出至于今是賴桓公之亂蔡人欲立其出我先君莊公
奉五父而立之蔡人殺之我又與蔡人奉戴厲公至于
莊宣皆我之自立夏氏之亂成公播蕩又我之自入君
所知也今陳忘周之大德蔑我大惠棄我姻親介恃楚
衆以憑陵我敝邑不可億逞我是以有往年之告未獲
成命則有我東門之役當陳隧者井堙木刊敝邑大懼
不競而恥大姬天誘其衷啟敝邑心陳知其罪授手于
我用敢獻功晉人曰何故戎服對曰我先君武莊為平

桓卿士城濮之役文公布命曰各服舊職命我文公戎服輔王以授楚捷不敢廢王命故也士莊伯不能詰乃受之

王圻續通考奏捷儀注凡各處奏捷鴻臚寺於早朝將差來人役引至御前宣讀捷音

隆慶六年令擇吉宣捷至日不奏事次日行慶賀禮

神宗八年定凡大捷於常朝期宣奏捷音是日百官各具吉服候宣捷之後鴻臚寺官致詞行五拜三叩頭禮

本日早即遣官薦告郊廟行翰林院撰文太常寺辦祭品中捷以下立宣捷不行祭告慶賀禮

右獻捷

宋史哲宗本紀元符二年秋七月丙寅洮西安撫使王瞻復邈川城西蕃首領勤巴阿勝以城降

禮志元符二年西蕃王隆贊邈川首領轄沁等降詔具儀注以受降日御宣德門設諸班直上四軍仗衛諸軍素服陳列降者各服蕃服以見審問訖有旨放罪各等

第賜首服袍帶百官稱賀訖再御紫宸殿賜宴會哲宗崩樞密院留隆贊等西京聽旨詔罷御樓立仗但引見于後殿隆贊一班契丹公主一班夏國回鶻公次之回鶻一班朶巴剌嘉勒并族屬次之應族屬首領各從其長以次起居僧尼公主皆蕃服蕃拜並賜冠服謝訖賜酒饌橫門外

政和初議禮局上受降儀皇帝乘輿升宣德門樓降輿坐御幄百官與降王蕃官各班樓下如大禮肆赦儀東

上閣門以紅條袋班齊牌引升樓樓上東上閣門官附
內侍承旨索扇扇合帝即御坐簾捲內侍又贊扇開侍
衛如常儀諸班親從并裏圍降王人等迎駕自贊常起
居次舍人贊執儀將士常起居次管幹降王使臣并隨
行舊蕃官常起居次禮直官舍人引百官橫行北向贊
者曰拜在位官皆再拜舞蹈三稱萬歲又再拜班首奏
聖躬萬福又再拜退百官各就東西位舍人引降王服
本國衣冠詣樓前北向女婦少西立僧又少西尼立于

後入內省官詣御坐前承旨傳樓上東上閣門官承旨
錄訖以紅條袋降制樓下東上閣門官承旨退降王以
下俯伏東上閣門官至令通事舍人掖之起首領以下
皆起鞠躬閣門宣有勅降王以下再拜僧尼止躬呼萬
歲閣門錄勅旨付管幹官降王等躬聽詰問如有復奏
閣門錄訖仍以紅條袋引升樓如無復奏入內省官詣
御坐承旨傳樓上閣門官稱有勅放罪訖舍人贊謝恩
降王以下再拜稱萬歲復序立入內省官詣御坐承旨

傳樓上閣門官稱有勅各賜首服袍帶樓下閣門官承
旨引所賜檐牀陳于西舍人宣曰有勅降王以下再拜
鞠躬舍人稱各賜某物賜物畢又再拜稱萬歲若賜官
即贊謝再拜並歸次易所賜服舍人先引降王以下至
授遙郡以上當樓前北向東上立贊再拜稱萬歲又再
拜次贊服冠帔婦女再拜僧尼別謝引還次贊樓上侍
立官稱賀再拜禮直官舍人分別百官橫行北向立贊
拜訖班首少前俛伏跪稱賀其詞中書隨事撰述賀訖

復位在位者又再拜舞蹈三稱萬歲又再拜東上閣門
官進詣樓前承旨就班首宣曰有制贊者曰拜在位官
皆再拜宣答其詞學士院隨事撰述又贊再拜三稱萬
歲又再拜樓上樞密院前跪奏稱某官臣某言禮畢內
侍索扇扇合簾垂帝降坐內侍贊扇開所司承旨放仗
樓下鞭鳴百官再拜退

蕙田案受降秦漢以下有之儀制自宋史始
故首宋

右受降

詩小雅六月吉甫燕喜既多受祉來歸自鎬我行永久

飲御諸友魚鼈膾鯉侯誰在矣張仲孝友

箋吉甫既伐玁狁而歸天

子以燕禮樂之則歡喜矣又多受賞賜也御侍也王以吉甫遠從鎬地來又日月長久今飲之酒使其諸友思

舊者侍之又加其珍美之饌所以極勸也

春秋隱公五年左氏傳臧僖伯曰三年而治兵入而振

旅歸而飲至以數軍實

注飲于廟以數軍徒器械及所獲也

昭文章明貴

賤辨等列順少長習威儀也

桓公十六年秋七月公至自伐鄭左氏傳夏伐鄭秋七月公至自伐鄭以飲至之禮也

孔叢子問軍禮饗有功于祖廟舍爵策勲焉謂之飲至此天子親征之禮也

陳書宣帝本紀大建八年夏四月甲寅詔曰元戎凱旋羣師振旅旌功策賞宜有享宴今月十七日可幸樂遊苑設絲竹之樂大會文武

舊唐書太宗本紀貞觀十四年十二月丁酉交河道旋

師吏部尚書陳國公侯君集執高昌王麴智盛獻捷于
觀德殿行飲至之禮

王圻續通考成祖永樂十二年二月詔親征衛拉特三月
車駕發北京六月壬寅朔寇達勒巴瑪哈穆特太平巴圖
博羅等率衆逆我師上麾柳升等發神機銃砲親率鐵
騎擊之達哩大敗上還帳中皇太孫入見上曰此賊尚
未還遲明追撲之必盡殲乃已皇太孫對曰陛下督戰
勤勞天威所加虜衆破膽矣今既敗走假息無所寧敢

返顧乎請不須窮追宜及時班師上然之庚戌班師戊午駐蹕三峰山之西南和寧王阿魯台遣所部都督多爾濟藏布等來朝命中官王安齎勅往勞之己巳車駕次黑山峪勅皇太孫以班師告天地宗廟社稷遂頒詔天下八月辛丑朔車駕至北京上御奉天殿受賀大宴文武羣臣及從征將校命禮部會議將士功賞

宣德三年八月上召公侯伯五軍都督府諭曰北寇擾邊朕將親歷諸關警飭兵備丁未發京師九月命諸將

搜山谷約畢至則班師戊午召文武大臣諭曰諸將至者今已六七孟冬廟享之期不遠應早旋師甲子詔班師車駕發鐵將軍店乙丑駐蹕偏嶺丙寅車駕入喜峰關內庚午駐蹕三河縣在京文武衙門各遣官進平胡表壬申駐蹕齊化門癸酉車駕至京師謁告太廟皇太后置酒上壽

蕙田案以上二事俱有讌樂故采入飲至之末

右飲至

易師卦上六大君有命開國承家小人勿用

何氏楷曰上處卦末乃師之終功之成論功行賞之時也有命即開國承家之命

李氏九我曰開國承家者所以優功臣而廣封建見聖人待天下之公小人勿用者所以御才將而絕禍端見聖人慮天下之遠

周禮夏官司勲戰功曰多

注剋敵出奇若韓信陳平司馬法曰上多前虜疏知多

是克敵出奇者以其言多是于衆之中比較多少之事故知是克敵出奇比彼為多者也云司馬法曰上功多虜者彼亦是戰以功多為凡有功者銘書於王之太常上居于陳前虜獲俘囚也

祭于大烝司勲詔之

注銘之言名也生則書于王旌以識其人與其功也死于烝先王祭

之詔蓋告其神以辭也

詩大雅江漢釐爾圭瓚秬鬯一卣告于文人錫山土田

于周受命自召祖命虎拜稽首天子萬年

傳釐賜也秬黑黍也鬯香

草也築煮合而鬱之曰鬯卣器也九命錫圭瓚秬鬯文人也築煮合而鬱之曰鬯卣器也九命錫圭瓚秬鬯文

人丈德之人也諸侯有大功德則賜之名山土田附庸

以鬯酒一罇使以祭其宗廟告其先祖諸有德美見記

者周岐周也自用也宣王欲尊顯召虎故如岐周使虎受山川土田之賜命用其祖召康公受封之禮岐周周

之所起為其先祖之靈故就之拜稽首者受王命策書也臣受恩無可以報謝者稱言使君壽考而已

五禮通考

圭

通典漢高祖有天下論功定封誓曰黃河如帶泰山如礪國以永存爰及苗裔於是定十八侯之位次以蕭何為第一

光武中興定封功臣詔曰諸將業遠功大誠欲傳于無窮其顯效未酬名籍未立者大鴻臚趣上朕將差而錄之於是封高密侯鄧禹等二十八人

晉太元十年論淮淝之功封謝安廬郡公謝石南康公謝玄康樂公謝琰望蔡公桓伊永脩公自餘封拜有差

唐高祖武德元年論太原建義功以秦王世民為首長
孫順德劉宏基等次之太宗即位定功臣封戶自裴寂
以下差功大小第之總四十三人

文獻通考宋定天下賞功臣石守信等有差乾道中以
中興十三處戰功列于銓法

明集禮論功行賞儀注前期內使監陳御座香案于奉
天殿如常儀尚寶司設寶案于殿上正中侍儀司設詔
書案于寶案之前設誥命案于丹陛正中之北設皇太

子諸王侍立位于殿上之東北設承制官承制位于殿上之東及宣制位于丹墀誥命案之北吏部尚書戶部尚書禮部尚書位于殿上之東南設大都督府兵部尚書位于殿上之西南應受賞官拜位于丹墀之中異位重行序立位于丹墀之西南受賞位于誥命案之南受賞執事位于受賞官序立位之西

每受賞官用捧誥命捧禮物者各一人

知班二人位于受賞官拜位之北東西相向贊禮二人位于知班之北東西相向典儀二人位于丹墀上之南

東西相向文武官侍立位于丹墀之北東西相向侍從
班起居注給事中殿中侍御史尚寶卿侍儀司官位于
殿上之東懸刀武官位于殿上之西殿前班指揮司三
人位于丹陛之西東向光祿寺三人位于丹陛上之東
西向拱衛司二人位于殿中門之左右典牧所官二人
位于仗馬之前宿衛鎮撫二人位于丹陛下東西相向
護衛千戶二十八人位于宿衛鎮撫之南稍後東西相
向護衛千戶八人位于奉天殿東西門之左右將軍二

人位于殿上簾前之東西將軍六人位于奉天殿門之
左右將軍四人位于丹陛上之四隅將軍六人位于奉
天門之左右俱東西相向鳴鞭四人位于丹陛之南北
向是日擊鼓初嚴金吾衛列旗幟器仗拱衛司設儀仗
車輅典牧司陳仗馬虎豹內使監擎執樂工陳樂皆如
正會之儀禮部陳設詔書吏部陳設誥命戶部陳設禮
物陳設執事各立于案之左右殿前班糾儀典儀知班
贊禮宿衛鎮撫護衛將軍各入就位舍人催受賞官及

侍立文武官各具朝服擊鼓次嚴侍從班文武官入迎
車駕舍人引受賞官齊班于午門外之南東西相向引
文武官齊班于午門之北東西相向擊鼓三嚴侍儀版
奏中嚴御用監官奏請皇帝于謹身殿服袞冕皇太子
諸王于奉天殿門東耳房具冕服舍人引文武官入就
丹墀侍立位引受賞官入就丹墀序立位侍儀版奏外
辦皇帝御輿以出仗動樂作侍衛導從如常儀陞御座
捲簾鳴鞭樂止司辰報時雞唱訖引進引皇太子諸王

自奉天門東門入樂作由東陞陞殿東門入至侍立位
樂止舍人引受賞官入就拜位知班唱班齊贊禮唱鞠
躬樂作拜興拜興拜興拜興平身樂止承制官前跪承
制由殿中門出中陞降至宣制位吏部尚書戶部尚書
禮部尚書由西門出西陞降立于誥命禮物案之東承
制官南向稱有制贊禮唱跪受賞官皆跪承制官宣制
曰朕嘉某等為國建功宜加爵賞今授某以某職賜以
某物其共承朕命

受賜員數不拘
多少載在其中

宣畢贊禮唱俛伏興

樂作拜興拜興平身樂止贊禮唱行賞舍人引受賞官
第一人詣案前贊禮唱跪搢笏吏部官捧誥命禮部官
捧禮物各授受賞官受賞官受誥命禮物以授左右左
右跪受于受賞官之左興退復位贊禮唱出笏俯伏興
復位舍人引受賞官復位引以次受賞官詣案前皆如
常儀承制官吏部尚書戶部尚書禮部尚書由西陞陞
西門入跪上位之西云承制訖興各復位贊禮唱鞠躬
樂作拜興拜興樂止贊禮唱搢笏鞠躬三舞蹈跪山呼

萬歲山呼萬歲再山呼萬萬歲

樂工齊聲應之

出笏俯伏興樂

作拜興拜興拜興拜興平身樂止贊禮唱禮畢侍儀跪
奏禮畢鳴鞭皇帝興樂作警蹕侍從導引至謹身殿樂
止引進引皇太子諸王還宮舍人引受賞官及文武官
以次出至午門外以誥命禮物置于龍亭用儀仗鼓樂
各送還本第

右論功行賞

周禮夏官大司馬若師不功則厭而奉主車

鄭司農云厭謂厭

冠喪服也軍敗則以喪禮故秦伯之敗于殽也春秋傳曰秦伯素服郊次鄉師而哭玄謂厭伏冠也奉猶送也送主歸于廟與社疏厭伏冠者案下曲禮云厭冠不入公門彼差次當總小功之冠以義言之五服之冠皆厭以其喪冠反吉冠于武上向內縫之喪冠于武下向上縫之以伏冠在武故得厭伏之名案檀弓注厭冠喪服其服亦未聞

鄭氏諤曰奉主車以歸肆師助牽之故肆師云師不功則助牽主車

王弼勞士庶子則相

注師敗王親弔士庶子之死者勞其傷者則相王之禮庶子卿大夫

之子從軍者或謂之庶士

鄭氏諤曰士庶子宿衛王宮者也王親征則從王在軍而屬司馬有死者王親弔之司馬相其弔勞之禮

以其在
軍故也

春官肆師凡師不功則助牽主車

鄭氏鈔曰戰所以全宗社不功而失乎主車是失宗社肆師掌為位以祭宗社為職大司馬于師不功則厭而奉主車肆師為大司馬之助而已

李嘉會曰牽主車亦所以安神靈也

禮記檀弓軍有憂則素服哭于庫門之外赴車不載橐韋

陳氏澂曰橐甲衣韋弓衣甲不入橐弓不入韋示再用也

右師不功

詩小雅采薇序采薇遣戍役也

采薇采薇薇亦作止曰歸曰歸歲亦莫止靡室靡家玁狁之故不遑啟居玁狁之故采薇薇薇薇亦柔止曰歸曰歸心亦憂止憂心烈烈載飢載渴我戍未定靡使歸聘采薇薇薇薇亦剛止曰歸曰歸歲亦陽止王事靡盬不遑啟處憂心孔疚我行不來彼爾維何維常之華彼路斯何君子之車戎車既駕四牡業業豈敢定

居一月三捷 駕彼四牡四牡騤騤君子所依小人所
腓四牡翼翼象弭魚服豈不日戒玁狁孔棘 昔我往
矣楊柳依依今我來思雨雪霏霏行道遲遲載渴載飢
我心傷悲莫知我哀

秋杜序秋杜勞還役也

有秋之杜有皖其實王事靡盬繼嗣我日日月陽止女
心傷止征夫遑止 有秋之杜其葉萋萋王事靡盬我
心傷悲卉木萋止女心悲止征夫歸止 陟彼北山言

采其杞王事靡盬憂我父母檀車幘幘四牡瘡瘡征夫
不遠匪載匪來憂心孔疚期逝不至而多為恤卜筮
偕止會言近止征夫邇止

范氏曰出車勞率故美其功杖杜勞衆故極其情先
以已之心為人之心故能曲盡其情民忘其死以
忠于上也

右遣戍

五禮通考卷二百三十九